

հանեցին պոլսական հրապարակին վրայ, և իրենցմէ շատեր ամուսնանալով պոլսեցի աղջկանց⁽¹⁾ հետ՝ եղան տուն տեղ, պահելով միշտ դաւառական ուրոյնութիւն մը երբայիկ՝ գէթ մինչեւ երկրորդ սերունդին:

Ինչպէս առաջներն ալ ակնարկած ենք՝ կեսարացի այս վաճառականներուն ի Կ. Պոլիս առեւտրական գործունէութեանց նախակարապետն եղած է Սենեքերիմ Մանուկեան՝ այդ իբր ութսունևհինգամեայ ծերունին, որուն կայծակիր աչքերն ու պատրիկ գնացքը տակաւին կը մատնէին⁽²⁾ անքուն գործունէութիւն և ագնուական ծագում: Շառաւիղ հինաւուրց գերդաստանի մը ի Կեսարիա, որդի Բարսեղ Մանուկեանի, և շատ կանուխ աչքը բացած վաճառական յարկերու տակ՝ 1810ի միջոցները կուգայ Կ. Պոլիս 17ամեայ հասակին, մինչ Թուրքիայի այս մայրաքաղաքին մէջ հազիւ քանի մը կեսարացիներ բոյն դրած էին (որոց հետ նաեւ իր մէկ եղբայրը)՝ իբրեւ բոլիցանի հին դրութեամբ, քանի մըն ալ մանր վաճառքի բովիսիոններ, մեծ մասով Չաքմաքըլար վալիտէ խանի մէջ. ասոնցմէ ու մէկ քանի արմտիքի վաճառականներէ զատ՝ ո՛չ ոք կար Կեսարացիներէն Կ. Պոլիսի մանիֆաթուրայի հրապարակը: Ինք՝ երիտասարդն Մանուկեան՝ գովելի նախաձեռնութեամբ սենեակ մը բանալով Կ. Պոլիսի շուկային մէջ՝ մէկ կող-

(1) Գաւառացիք ձախող ընտրութիւնն մըն է՝ որ կընեն ամուսնանալով Կ. Պոլսեցի աղջկանց հետ. նախ վասն զի գաւառացի խեղճ աղջիկները լքուած կը բազմանան անամուսին, երկրորդ՝ վասն զի այդ գաւառացիք, ի պատիժ իրենց այս օձախալըքութեան, չկըրնալով ներդաշնակուիլ պոլսեցի բարբերուն հետ՝ արագ արագ կը մատնուին ընտանեկան թշուառութեանց իրենց սարօքը: Ասոնց օրինակները շատ են:

(2) Վախճանեցաւ 1908 Յունուար ամսուն ի Բերա Կ. Պոլիսի, տոհմային գործերու մէջ ալ կատարելէ ետք մեծ դեր: